

# Aningaasanoorutit ilaannit iluanaarutinit agguaassisarneq pillugu Inatsisartut Inatsisaat

## Kapitali 1

### Agguanneqartarnerat

**§ 1.** Aningaasanoorutit ilaat pillugit Kalaallit Nunaannut inatsit naapertorlugu pissarsiassat ukiumoortumik Kalaallit Nunaannut pisassanngortinnejartartut Naalakkersuisut tamanut iluaqutaasussamik siunertanut makkununnga agguatissavaat:

- 1) 50 %-ii timersorernut tamanit peqataaffigineqarsinnaasunut, innarluutillit utoqqaallu timersornerat ilanngullugu,
- 2) 9,1 %-ii piukkunnaatillit pikkorinnerillu timersornerinut,
- 3) 13,6 %-ii meeqqat inuusuttullu peqatigiiffiinut, aamma
- 4) 27,3 %-ii tamanut iluaqutaasussamik siunertanut allanut, taamatuttaaq kulturimut tunngatillugu siunertanut, inunnik qaammarsaanermut siunertanut, nappaatinik akiuiniarnermut pinaveersaartsinermullu siunertanut, inooqatigiinnermut tunngasunut siunertanut, asimiitsinissanik siunertanut aamma tamanut iluaqutaasussanik ilisimatusarniarluni siunertanut.

*Imm. 2.* Aningaasat Kalaallit Nunaanni pinnguaatit pillugit naalagaaffimmut akitsuutip 2004-mi atorunnaarsinneqartup annertoqatai siunertanut imm. 1-im i taaneqartunit allaanerusunut atorneqarsinnaapput.

*Imm. 3.* Naalakkersuisut aningaasaateqarfinnut suliniaqatigiiffinnullu allanut aningaasanoorutit ilaannit iluanaarutinik tamanut iluaqutaasussanik siunertanut agguassisartunut imm. 1-im i taaneqartutut tamanut iluaqutaasussanik siunertanut tapiissuteqartoqarsinnaatillugu aningaasanik tunissuteqarnissaq pillugu isumaqatigiissuteqarsinnaapput. Aningaasanik tunissutissatut isumaqatigiissutigineqartut pissarsiassanit ukiumoortumik Kalaallit Nunaannut pisassanngortinnejartunit imm. 1-im i taaneqartunut agguassisoqartinnagu ilanngaatigineqassapput.

**§ 2.** Atugassanngortitat § 1, imm. 1-im i taaneqartut imatut agguanneqassapput:

- 1) atugassanngortitat § 1, imm. 1, nr. 1-im i taaneqartut Kalaallit Nunaanni Timersoqatigiit Kattuffiannut, timersorernut tamanit peqataaffigineqarsinnaasunut, innarluutillit utoqqaallu timersornerat ilanngullugu, agguasseqqinermik isumaginnittussamut agguanneqassapput,
- 2) atugassanngortitat § 1, imm. 1, nr. 2-mi taaneqartut Elite Sport Greenlandimut, piukkunnaatillit pikkorinnerillu timersornerinut agguasseqqinermik isumaginnittussamut agguanneqassapput,
- 3) atugassanngortitat § 1, imm. 1, nr. 3-mi taaneqartut Sorlammur, meeqqat inuusuttullu peqatigiiffiinut agguasseqqinermik isumaginnittussamut agguanneqassapput, aamma

4) atugassanngortitat § 1, imm. 1, nr. 4-mi taaneqartut qinnuteqaateqartoqarneratigut Naalakkersuisunit agguanneqassapput.

*Imm. 2. Imm. 1, nr. 1-miit 3-mut atugassanngortitat taaneqartut agguateqqinneranni allaffissornikkut aqutsineq Naalakkersuisut tigusinnaavaat imatut pisoqartillugu:*

1) soqutigisaqaqatigiiffiup Naalakkersuisut taamaaliortoqarnissaanik kissaateqarfingippagut, imaluunniit

2) pingaarutilimmik aalajangersimasumillu tunngavilersukkamik soqutigisaqaqatigiiffik suliassaminik isumaginnissinnaajunnaarsorineqarpat.

## Kapitali 2

*Tapeeriaatsit, tapiiffingineqarnissamut piumasaqaatit aamma periutsit*

**§ 3.** Inunnut nunami maani najugaqartunut imaluunniit peqatigiiffinnut, soqutigisaqaqatigiiffinnut, suliffeqarfinnut, oqartussaasunut il.il. Kalaallit Nunaanni angerlarsimaffeqartunut taamaallaat tapiissuteqartoqarsinnaavoq.

*Imm. 2. Imm. 1-im i alajangersagaq apeqquataatinngu Elite Sport Greenland inunnut Kalaallit Nunaata avataani najugalinnut tapiissuteqarsinnaavoq tapiissutisisussat Naalakkersuisunit timersornermut piukkunnaatilittut imaluunniit timersortartutut pikkorinnertut akuersissutigineqarsimappata.*

*Imm. 3. Imm. 1-im i alajangersagaq apeqquataatinngu Avalak tapiiffingineqarsinnaavoq.*

## Kapitali 3

*Nakkutilliineq misissuinerlu*

**§ 4.** Soqutigisaqaqatigiiffit § 2, imm. 1, nr. 1-im iit 3-mut taaneqartut kingusinnerpaamik 1. juunimi Naalakkersuisunut ukiumut naatsorsuuteqarfiusumut qaangiuttumut naatsorsuutitik kukkunersiorneqarsimasut naatsorsuutinullu atortussat allat nassiuressavaat. Naatsorsuutit ukiumi qaammatisiuteqarfiusumi qaangiuttumi atugassanngortinneqartunit agguanneqarsimasut nalunaarsuutaannik kukkunersiusumit naalagaaffimmit akuerisaasumit imaluunniit naalagaaffimmut nalunaarutigineqarsimasumit atsiorneqarsimasunik ilanngussivigneqassapput.

*Imm. 2. Naatsorsuutit, naatsorsuutinut atortussat allat nalunaarsuutillu imm. 1-im i taaneqartut piffissaq eqorlugu tiguneqanngippata, imaluunniit Naalakkersuisut paasippassuk aningaasanoorutit ilaannit iluanaarutit siunertanut naapertuutumik, § 1 takuuk, atorneqanngitsut, Naalakkersuisut aningaasanoorutit ilaannit iluanaarutinit soqutigisaqaqatigiiffinnut siunissami akiliutigineqartussat kinguartissinnaavaat naatsorsuutit, naatsorsuutinut atortussat allat nalunaarsuutillu nassiuresserlugit imaluunniit aningaasanoorutit ilaannit iluanaarutit siunertanut naapertuutumik atorneqarnissaat isumannaarneqareerserlugu. Naalakkersuisut akiliutigineqartussat kinguartinneqarnerannut atatillugu atugassanngortinneqartunik agguasseqqittarnerup allaffissornikkut aquunneqarnera tigugallarsinnaavaat.*

**§ 5.** Tapiissutisisartut soqutigisaqaqatigiiffillu § 2, imm. 1, nr. 1-im iit 3-mut taaneqartut piumaffingineqarnermikkut paassisutissat atorfissaqartinneqartut tamaasa Naalakkersuisunut nassiuressavaat, taamatuttaaq qinnuteqaatit, aalajangiinerit, agguassinermut najoqqtassat, ilaasortat amerlassusaat, akiliutit il.il. pillugit paassisutissat.

**§ 6.** Tapiissutigineqartut tamakkiisumik ilaannakuusumilluunniit utertillugit akileeqquneqarsinnaapput, qinnuteqaateqartoq eqqunngitsunik paasissutissiisimappat, tapiissuteqarnissamut piumasaqaatit naammassineqarsimanngippata imaluunniit ingerlanneqartoq sinneqartoofiusimappat.

## Kapitali 4

*Suliassat suliarineqartarnerat aamma maalaarsinnaaneq*

**§ 7.** Pisortat ingerlatsineranni suliassat suliarineqartarnerat pillugu Inatsisartut inatsisaanni aammalu pisortat ingerlatsineranni tamanut saqqummiussisussaatitaaneq pillugu inatsisartut inatsisaanni aalajangersakkat § 2, imm. 1, nr. 1-imiit 3-mut soqtigisaqaqtigiiiffnnut taaneqartunut atuupput taakku Inatsisartut inatsisaat manna taannalu malillugu malittarisassat atuuttussanngortinneqartut naapertorlugit Naalakkersuisut sinnerlugit aalajangiinissamut piginnaatitaaffilerneqarsimappata.

**§ 8.** Naalakkersuisut kikkut tapiiffigineqarsinnaanerininik sinaakkutissiat, tapeeriaatsit, tapiisinnaanermut piumasaqaatit aamma tapiinermi atugassarititaasut pillugit erseqqinnerusunik malittarisassanik aalajangersaasinnaapput.

*Imm. 2.* Naalakkersuisut qinnuteqaatit suliarineqassappata aalajangersimasunik anguniakkat pilersaarutitaannik allaaserinninnernik, aningaasatigut missingersuutinik, ilaasortat amerlassusaannik nalunaarsuutinik, suliassatut pilersaarutinik assigisaannilluunniit upternarsaatitut saqqummiussisoqarnissamik piumasaqaateqarsinnaaneq pillugu erseqqinnerusunik maledruagassiorsinnaapput.

*Imm. 3.* Naalakkersuisut naatsorsuutinik tunniussisarneq pillugu erseqqinnerusunik malittarisassanik aalajangersaasinnaapput, tamatumunnga ilanngullugu allat § 2, imm. 1, nr. 1-imiit 3-mut soqtigisaqaqtigiiifft taaneqanngitsut, aningaasanoorutit ilaannit iluanaarutinit pissarsisimagunik naatsorsuutinik saqqummiussissasut.

*Imm. 4.* Naalakkersuisut aningaasanoorutit ilaannit iluanaarutinik § 1, imm. 1-imi eqqartorneqartutut atuisinnaanerup saniatigut atuisinnaaneq pillugu malittarisassanik erseqqinnerusunik aalajangersaasinnaapput tamatumunnga ilanngullugit allaffisornermut aamma paasissutissiinermut atuineq.

*Imm. 5.* § 2-mi imm. 1, nr. 1-imiit 3-mut naapertorlugu soqtigisaqaqtigiiiffnnit taakkartorneqartunit tapiissutinik agguassinerme aalajangikkat pillugit maalaarutinik suliaqarnissamut Naalakkersuisut malittarisassiorsinnaapput.

## Kapitali 5

*Atortuulersitsineq*

**§ 9.** Inatsisartut inatsisaat atuutilissaq 1. januar 2012.

*Imm. 2.* Inatsisartut inatsisaata atuutilerneratigut tipsernermit lottornermillu iluanaarutinik agguassisarneq pillugu Inatsisartut inatsisaat nr. 7, 1. juni 2006-imeersoq atorunnaarsinnejassaaq.

*Namminersorlutik Oqartussat, ulloq 22. november 2011*

Kuupik Kleist

**Namminersorlutik Oqartussat**  
Imaneq 4  
3900 Nuuk  
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut